

TEKS UCAPAN TETAMU KEHORMAT

**MAJLIS PERHIMPUNAN JEMAAH HAJI
TAHUN 1440H/2019M**

**YANG MULIA
PENGIRAN DATO SERI PADUKA HAJI BAHROM BIN PENGIRAN HAJI BAHAR
TIMBALAN MENTERI HAL EHWAL UGAMA
NEGARA BRUNEI DARUSSALAM**

**PADA
HARI RABU
25 MUHARRAM 1441H BERSAMAAN 25 SEPTEMBER 2019M**

**JAM
9.00 PAGI**

**BERTEMPAT
DI DEWAN BANQUET BRIDEX, JERUDONG
NEGARA BRUNEI DARUSSALAM**

بِسْمِ اللَّهِ الرَّحْمَنِ الرَّحِيمِ
الْحَمْدُ لِلَّهِ رَبِّ الْعَالَمِينَ
وَالصَّلَاةُ وَالسَّلَامُ عَلَى أَشْرَفِ الْأَنْبِيَاءِ وَالْمُرْسَلِينَ وَعَلَى آلِهِ وَصَحْبِهِ أَجْمَعِينَ
السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Yang Mulia,

Awang Haji Abdullah bin Haji Mohamad,

Pemangku Pengarah Urusan Haji, KHEU

Selaku Pengerusi Majlis Perhimpunan Jemaah Haji Tahun 1440H

Yang Mulia,

As-Sayyid Al Ustaz Nawwaf Mu'azzi El Bidwei

Deputy Head Mission, Kedutaan Besar Kingdom of Saudi Arabia ke Negara
Brunei Darussalam

Yang Mulia,

Awang Haji Mohd Serudin bin Haji Timbang,

Timbalan Setiausaha Tetap, Kementerian Hal Ehwal Ugama

Yang Mulia,

Dr. Haji Adanan bin Haji Basar,

Ra'es KUPU SB.

Yang Mulia,

Pengarah-Pengarah, Pengarah-Pengarah Urusan Syarikat-Syarikat Pengendali Perkhidmatan Pakej Haji, Penolong-Penolong Pengarah, Pegawai-Pegawai Kanan, Jawatankuasa Majlis Perhimpunan Jemaah Haji, Jemaah Haji Tahun 1440H/2019M yang diraikan serta para hadirin dan hadirat yang dihormati sekalian.

Alhamdulillah, peramba/saya bersyukur ke hadrat Allah *Subhanahu Wata'ala* kerana dengan limpah kurnia, rahmat dan izinNya jua, kita dapat sama-sama hadir pada pagi ini dalam Majlis Perhimpunan Jemaah Haji Bagi Tahun 1440H/2019M.

Ini adalah kali kedua peramba/saya dijemput hadir ke Majlis Perhimpunan ini dan peramba/saya sukacita mengucapkan terima kasih kepada Pengerusi dan juga ahli-ahli Jawatankuasa Majlis kerana menjemput peramba/saya hadir bagi menyampaikan ucapan dan seterusnya menyampaikan sijil-sijil penghargaan kepada Syarikat-Syarikat Pengendali Perkhidmatan Pakej Haji Tahun 1440H/2019M.

Peramba/Saya juga sukacita mengambil kesempatan untuk mengucapkan tahniah kepada Jabatan Urusan Haji, KHEU dan kepada empat buah Syarikat Pengendali Perkhidmatan Pakej Haji bagi tahun 1440H yang terdiri dari **Darussalam Holdings Sendirian Berhad, Straits Central Agencies (B) Sendirian Berhad, Raudah Al-Amin Sendirian Berhad, dan At-Taqwa Travel & Tours Sendirian Berhad** kerana dapat melaksanakan tugas dan

tanggungjawab serta memberikan perkhidmatan yang cukup cemerlang dan sempurna; memeduli kesejahteraan para jemaah haji Negara Brunei Darussalam di Tanah Suci tempoh hari.

Peramba/Saya juga berasa sangat gembira bila mengetahui bahawa Majlis pada pagi ini adalah hasil muafakat, kerjasama dan kolaborasi ke empat-empat buah Syarikat berkenaan dan juga Jabatan Urusan Haji, Kementerian Hal Ehwal Ugama dalam mengungkapkannya majlis pada pagi ini buat kali yang ke-duanya setelah pertama kalinya diadakan pada tahun lalu 1439H/2018M. Apa yang diharapkan semoga usaha dan kerjasama seperti ini akan sentiasa berterusan dan diberkati Allah *Subhanahu Wata'ala*.

Di kesempatan ini juga, peramba/saya juga ingin mengucapkan tahniah dan selamat kepada Jemaah Haji yang telah menunaikan fardhu haji baru-baru ini. Peramba/Saya yakin jemaah haji kembali ke pangkuan keluarga dan kembali ke tanahair dengan membawa seribu kenangan, seribu pengharapan supaya segala amalan yang telah dilaksanakan sewaktu abiskita berada di Tanah Suci tempoh hari diterima oleh Allah *Subhanahu Wata'ala* dengan beroleh haji yang mabrur; haji yang tiada ada ganjaran baginya melainkan ganjaran syurga sebagaimana sabda Rasulullah *Shallallahu 'alaihi Wasalam*:

عَنِ ابْنِ عَبَّاسٍ رَضِيَ اللَّهُ عَنْهُمَا، قَالَ: قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: «الْحَجُّ الْمَبْرُورُ لَيْسَ لَهُ جَزَاءٌ إِلَّا الْجَنَّةُ»

Maksudnya:

“Haji yang mabrur tidak ada ganjaran baginya melainkan syurga”

(HR Muslim)

Hadirin-hadirat yang peramba/saya hormati sekalian.

Perhimpunan pada pagi ini pada hemat peramba/saya memberi makna yang sangat besar kepada kita semua yang hadir sebagai tanda menzahirkan rasa syukur atas sempurnanya dan selesainya para jemaah haji kita menunaikan ibadat haji dan juga mengeratkan lagi hubungan silaturrahim yang telah dijalin oleh para jemaah haji Negara ini kerana dapat menyempurnakan ibadat haji dengan selesa dan sejahtera seterusnya kembali ke tanah air dengan selamat. Hubungan silaturrahim yang telah dipupuk dan menjadi intim dan erat ini sudah setentutnya memberi impak yang positif bagi diri para jemaah untuk terus istiqamah membuat amalan-amalan kebaikan dalam kehidupan seharian sebagaimana ketika berada di Tanah Suci tempoh hari.

Alhamdulillah, Tuan-Tuan dan Puan-Puan para jemaah telah dapat menyempurnakan rukun Islam yang kelima iaitu menunaikan ibadat haji ke Tanah Suci. Berkaitan dengan hal ini, suka peramba/saya menyatakan bahawa ada tiga perkara yang seharusnya mendapat perhatian dan dititik-beratkan oleh para jemaah sekalian setelah abiskita selamat pulang ke tanahair.

Pertama: Aspek keperibadian

Setiap jemaah haji hendaknya terus berupaya melestarikan amalan yang telah dijalankan selama di Tanah Suci, seperti menunaikan sembahyang di awal waktu, menunaikannya secara berjemaah dan lebih utama lagi berjemaah di masjid, melaksanakan ibadah-ibadah sunat, sentiasa menghiasi diri dengan

sifat-sifat terpuji, bersegera bertaubat apabila melakukan atau telanjur melakukan kesalahan dan juga ibadah-ibadah yang lainnya.

Kedua: Aspek 'ubudiyah

Setiap jemaah haji hendaknya terus berupaya untuk meningkatkan kualiti ibadat sembahyang, sentiasa melazimi membaca al-Quran, perihatin dan segera memberi pemedulian terhadap orang yang daif dan fakir miskin melalui zakat, infak dan sebagainya.

Ketiga: Aspek sosial

Setiap jemaah haji berusaha membiasakan diri sembahyang berjemaah, menyantuni anak-anak yatim, berziarah kepada orang sakit, bersedia memberikan pertolongan dan bekerja bergotong royong dan lain-lain amalan kemasyarakatan yang bermanfaat.

Matlamatnya adalah seperti yang dikatakan oleh Syeikh Hassan al-Mussyath yang lahir di Mekkah pada tahun 1317H dan wafat di Mekkah pada tahun 1399H menyatakan bahwa "*Tanda-tanda kemabruran ibadah haji seseorang apabila mampu membentuk kepribadiannya setelah melaksanakan ibadah haji berubah menjadi lebih baik daripada sebelumnya dan tidak lagi mengulang maksiat*".

Semoga para jemaah haji sekalian dapat melestarikan pelaksanaan ibadat haji itu dalam kehidupan peribadi, keluarga, masyarakat, bangsa dan negara serta diberkati Allah *Subhanahu Wa Ta'ala*.

Di dalam al-Quran telah dijelaskan bahawa apabila Allah *Subhanahu Wa Ta'ala* menerima amal seorang hamba, maka Dia pasti akan menolongnya dalam meningkatkan amal perbuatan baik selepasnya sebagaimana firman Allah *Subhanahu Wa Ta'ala* dalam Surah Al-Lail ayat 5 hingga 7:

فَأَمَّا مَنْ أَعْطَىٰ وَاتَّقَىٰ ۖ وَصَدَّقَ بِالْحُسْنَىٰ ۖ فَسَنِيئِهِمْ لِلْإِسْرَىٰ ۖ

Tafsirnya:

“Adapun orang yang memberikan (hartanya pada jalan Allah) dan bertaqwa. Dan dia mengakui kebenaran adalah ganjaran yang baik (syurga). Maka Kami akan memudahkannya untuk mendapat kesenangan”

Para hadirin dan hadirat yang peramba/saya hormati sekalian,

Di kesempatan ini peramba/saya juga ingin menyampaikan ucapan tahniah dan setinggi-tinggi penghargaan kepada pegawai-pegawai Pejabat Urusan Haji Pentadbiran, pegawai-pegawai Pejabat Urusan Haji Perubatan dan pegawai-pegawai dari Syarikat Pengendali Perkhidmatan Haji; Darussalam Holdings Sendirian Berhad, Straits Central Agencies (B) Sendirian Berhad, Raudah Al-Amin Sendirian Berhad dan At-Taqwa Travel & Tours Sendirian Berhad di atas kecekapan dan kewibawaan abiskita semua dalam mengurus-tadbir dan mengendalikan jemaah haji negara pada tahun ini. Peramba/Saya percaya kejayaan ini adalah kejayaan bersama, hasil sokongan dan dokongan dari semua pihak yang terlibat serta doa semua para jemaah haji jua. Apa yang diharapkan abiskita akan terus beriltizam dan istiqamah untuk terus

meningkatkan mutu kerja (pengurusan) terutama dalam melaksanakan tanggungjawab yang diamanahkan ini sebaik-baiknya di masa-masa mendatang.

Satu perkara juga yang sangat penting untuk kitani semua memberikan setinggi-tinggi penghargaan ialah persediaan yang telah diusahakan oleh Jabatan Urusan Haji, Kementerian Hal Ehwal Ugama dalam memberikan kefahaman serta ilmu berkenaan Ibadat haji kepada bakal jemaah. Iaitu dengan mengambil inisiatif menganjurkan kursus Ibadat haji setiap tahun sama ada sebelum berangkat dan ketika berada di tanah suci bagi memberi ilmu serta pendedahan berkenaan ibadah Ibadat haji kepada para jemaah haji agar bakal jemaah akan lebih bersedia dari segi kefahaman ibadat, tuntutan fizikal dan persediaan rohani ketika menunaikan ibadat haji.

Alhamdulillah hasil daripada kursus yang diadakan itu, ia telah melahirkan jemaah haji berpengetahuan, berakhlak mulia, berdisiplin serta bersopan-santun dan dapat melakukan ibadat dan manasik haji dengan baik tanpa menimbulkan banyak masalah. Oleh itu, peramba/saya berharap agar jemaah haji terus kekalkan niat yang betul, disiplinkan diri sampai bila-bila dan di mana saja berada.

Para hadirin dan hadirat yang peramba/saya hormati sekalian,

Di kesempatan ini juga, peramba/saya ingin mengucapkan tahniah di atas kejayaan dan kecemerlangan empat syarikat pengendali haji tahun ini yang sebentar lagi akan menerima sijil penghargaan. Peramba/saya ingin berseru kepada semua Syarikat Operator Haji yang telah diberi kepercayaan mengendalikan perkhidmatan Haji dan Umrah agar dapat memberikan komitmen yang padu lagi telus dalam menjalankan tanggungjawab yang diamanahkan, ikhlas kerana Allah *Subhanahu Wa Ta'ala* jua dengan mematuhi segala syarat-syarat dan peraturan-peraturan mengendalikan perkhidmatan pakej Haji yang telah ditetapkan dan seterusnya meningkatkan keperihatinan dan pemberian perkhidmatan dengan penuh hikmah terhadap para jemaah yang berurusan dengan Syarikat masing-masing.

Sebelum mengakhiri ucapan ini, peramba/saya sekali lagi mengucapkan terima kasih kepada pihak penganjur dan semoga Majlis Perhimpunan ini menjadi wadah bagi kita meningkatkan keberkesanan pengurusan haji di Negara Brunei Darussalam di masa akan datang.

Sekian,

وبالله التوفيق والهداية والسلام عليكم ورحمة الله وبركاته